



REPÚBLIKA DEMOKRÁTIKA TIMOR-LESTE

DISKURSU SUA EXSELÉNSIA PRIMEIRU-MINISTRU

KAY RALA XANANA GUSMÃO

IHA OKAZIAUN

FÓ POSE BA GOVERNUN KONSTITUSIONÁL DA-9

**Palásiu Prezidensiál
Dili, loron 01 fulan-julhu tinan 2023**

Sua Exselénsia, Prezidente Repúblika,
Dr. José Ramos-Horta

Sua Exselénsia, Prezidente Parlamentu Nasionál,
Sra. Maria Fernanda Lay

Sua Exselénsia, Senhor Prezidente Tribunál Rekursu,
Dr. Deolindo dos Santos

Suas Exselénsias, Ilustres Dignitárius husi Países vizinhos no Ilustres
Reprezentantes husi Organizasoens Internasionais

Suas Exselénsias, Senhores Embaixadores
Distintus Deputadus
Exselénsias, Distintu Konvidadus
Senhoras no Senhores

Povu Timor-Leste, ida-ne'ebé ha'u hakru'uk ho respeitu tomak!

Ba dala-uluk, ha'u hakarak hato'o liuafuan boasvindas ba Dignitárius sira-hotu, ne'ebé mai husi países vizinhos no ne'ebé presente iha serimónia ida-ne'e.

Ha'u hakarak agradese ba ita boot sira-nia jentileza hodi mai to'o Dili no ita boot sira-nia ilustre prezensa mai atu dignifika Timoroan sira-nia kompromisu, hodi hatudu iha Eleisoin Parlamentares foin lalais ne'e, atu hametin Estadu Direitu Demokrátiku iha Timor-Leste, no atu kontinua dalan ba progresu no dezvoltamentu nian, ne'ebé sei fó garantia moris di'ak nian ida ba ninia sidadaun sira.

Exseléncias,
Ilustres Konvidadus,

Iha tinan 2012, tinan sanulu-resin-ida liu ona, ha'u hetan onra atu simu fali pose, iha Salaun Nobre Palásiu Lahane, hanesan Primeiru-Ministru ba Governu Konstitusionál da-5. Ohin, iha Povu Timor-Leste nia oin, ha'u mai atu asume dala-ida tan responsabilidade todan ida atu kontinua ho prosesu konstrusaun Estadu no konstrusaun Nasaun nian.

Tinan 21 ona, maka ita restaura Independénsia Nasionál, iha serimónia solene ida ne'ebé hala'o iha Tasi Tolu, iha loron 20 fulan-maiu tinan 2002, ho prezensa husi entidades internacionais ne'ebé a'as liu, nune'e maka Timor-Leste sai hanesan país ida ne'ebé foun liu iha mundu.

Hafoin sai tiha husi luta ida ne'ebé naruk, Estadu foun ida-ne'e, buka oinsá atu hamrik husi ahi-kadesan, husi violénsia ne'ebé uluk akontese tiha ona, durante no hafoin istória Referendu tinan 1999 nian, iha ne'ebé mak eróiku no valorozu Povu Timor-Leste, la husik liu atu uza nia direitu fundamentál hodi deside kona-ba nia distinu.

Ita hatene momoos katak, ita hanesan Estadu frájil ida iha aspetu hotu-hotu, hahú husi kapasidade jestaun no funksionamentu ba aspetus legais, nune'e mós introdúz sistemas ne'ebé maka sei regula atuasaun hotu Estadu nian.

Ho vizaun ne'ebé orienta husi misaun atu harii no hametin instituisaun sira Estadu nian, IV Governu konsege estabelese fundasaun sira hodi kria sistema ho transparénsia totál no responsabilizasaun nian ida, iha prestasaun kontas responsabilidade no ho transparénsia nian, iha aktus administrativus governasaun no rekrutamentu ba funksionáriu públikus liuhusi méritu, independente husi fatores polítikus.

Hodi nune'e, mosu konjuntura política ida, iha prosesu konstrusaun Estadu, ho mote "husi frajilidade ba reziliénsia", ne'ebé konta ho apoiu polítiku no tékniku husi instituisoins internacionais, hanesan Banku Mundiál (BM), Fundu Monetáriu Internasionál (FMI), Banku Dezenvolvimentu Aziátiku (BAD), no husi paízes amigus, ne'ebé rekoñese tiha ona pasus seguros, ne'ebé fó husi Estadu Timor-Leste no hodi apela ba hametin sistema fortalesimentu no instituisoens Estadu nian ne'ebé di'ak.

Hanesan sira hotu hatene ona, ohin, ha'u hato'o iha ne'e ho aliansa foun ida husi Partidu rua - CNRT no Partidu Demokrátiku - iha kompromisu komún ida atu restaura Estadu Direitu Demokkrátiku.

Ha'u hatene katak eziste sensasaun ida ne'ebé ladi'ak ne'ebé maka ha'u fó prioridade ba membrus antigos Ezekutivu husi IV no husi V Governu, ne'ebé ha'u maka nu'udar Primeiru-Ministru. Ha'u kompriende sosiedade timorensia nia desepsaun, kona-ba falta kuadrus polítikus no téknikus foun. Tamba ne'e, no atu responde ba preokupasaun husi sosiedade timorensia nian, ha'u hakarak esprika katak importante tebtibes atu lori tama sira ne'ebé maka hatene ona sistema ne'e, atu nune'e esforsu sira atu repoin legalidade bele lori rezultadus konkretus no imediatu.

Ha'u mós kompriende deskonfortu balu husi parte sosiedade nian, tanba númeru membrus Governu nian ne'ebé maka boot tebtibes. Ha'u labele evita atu reúne timor-oan sira-hotu, tamba Governu da-9 kompromete ona atu marka diferensa - iha planu, iha asaun no iha jestaun responsabilidades nian.

Tamba ne'e, mak estrutura orgánika husi Governu Konstitusionál da-9, bazeia ba iha filozofia atu kontinua hala'o nafatin progresus ne'ebé alkansa ona to'o tinan 2017 no atu konduz fila-fali, administrasaun públika ba objetivu sira efisiénsia no efikásia nian, iha prestasaun servisu sira ba povu no prestasaun responsabilidades ba Estadu.

Halo korresaun hirak ne'ebé maka presiza atu halo, halo servisu barak liután no halo di'ak liu, ne'e maka plataforma komún entendimentu nian ba formasaun Governu foun ida-ne'e. Ita-nia política governativa sei orienta tuir prinsípius boa governasaun, inkluzo nian no prinsípiu hotu ne'ebé maka hotu-hotu tenke obedese ba Lei.

Ita-nia vizaun maka nasaun ida ne'ebé ninia sosiedade moris di'ak no saudavel, matenek no kualifikada, inovadora no dinámika, ho susesu generalizadu ba beins no servisu esensiais no iha ne'ebé maka produsaun no empregu iha setores produtivus sira-hotu bele hatan ba ekonomia emerjente ida.

Atu bele akontese ida-ne'e, estrutura husi Governu da-9, ninia objetivu maka atu fó ba membru Governu ida-idak misaun ida atu kumpre, iha áreas no setores oinoin, atu ita bele hatudu asaun desiziva ida, iha períodu krusiál mudansa nian, nune'e

mós konsidera preparasaun, iha Munisípiu ida-idak, pesoál tékniku ne'ebé nesesáriu, ba prosesu desentralizasaun poderes nian.

Povu ne'e, uza ninia direitu lejítimu, fó mensajen ne'ebé klara: **mai ita salva Estadu Direitu Demokrátiku**, atu ita bele la'ó ho otimizmu iha dalan ne'ebé iha progresu!

Ba Povu tomak ami jura, ohin, katak ami iha konsiénsia tomak ba ami-nia responsabilidade sira no bainhira kualkér ami sira ne'e ida maka sente laiha kbi'it atu hala'ó ninia misaun, ami sei laiha dúvida hodi husu demisaun ba funsaun hirak ne'ebé mak ami asumi.

Mensajen polítika ida-ne'e sei marka, loloos, Istória Nasaun nian, tanba sai mós hanesan Lisaun polítika ida ba futuro Lideransa País nian, tuir orden atu labele monu ba sala ne'ebé hanesan katak, sei iha continuidade, sei lori ita-nia Estadu ba situasaun ida Estadu nian ne'ebé falladu!

Exelénsia, Señor Prezidente Repúblika

Distintus Konvidadus,

Atu hatan ba espetativas povu no sosiedade timoroan nian, Governu IX kompromete-an, iha loron 120 governasaun dahuluk nian, atu:

1 – Hadi'a filafali normalidade demokrátika, liuhusi Parlamentu lejítimu, ne'ebé hahú ona ninia Lejizlatura VI, no liuhusi Governu ida legál, hodi aprova Programa Governu ba tinan 5, aprova Orsamentu Retifikativu ba tinan 2023 no aprova Orsamentu Jerál Estadu nian ba tinan 2024. Sei halo esforsu tomak hodi revoga lejizlasaun no regulamentasaun tomak ne'ebé presiza ba konsolidasaun Estadu nian;

2 – Revoga Lei nú. 3/2014, ne'ebé harii ona RAEOA no ZEEMS, hodi subordina Autoridade RAEOA ba kontrolu ida ne'ebé di'ak husi Governu Sentrá, tanba objetivu ne'ebé deskreve iha Lei hodi harii ZEEMS simplezmente la delineadu, maske iha tinan sia naruk nia laran no hala'ó ho lalais Auditoria ba atividades hotu, ne'ebé inklui prosesu akizisaun karun husi “Ró Haksolok”;

3 – Anula Lei ne’ebé harii Munisípiu Ataúru, tanba laiha kondisaun infraestruturas no lojístikas iha illa Ataúru, hanesan estrada, eletrisidade, bee, portu no aeroportu;

4 – Hala’o Auditorias ba Tribunál-de-Kontas, Komisaun Antikorrupsaun no Ministériu Públiku, kona-ba implementasaun programas no falta prosesu aprovizionamentu ba projetu barak;

5 - Hala’o Auditoria ba Komisaun Funsau Públika no Inspesaun-Jerál Estadu, kona-ba rekrutamentu ilegál sira no hapara kontratu sira laiha justifikasaun;

6 - Hala’o Auditoria ba fraude eleitorál, ne’ebé komete husi Administraun Eleitorál, iha Eleisaun Parlamentár sira foin lalais ne’e, atu bele hapara konfliktu interesse no evita atu labele repete iha futuru hodi salvaguarda Estadu Direitu Demokrátiku;

7 – Reestrutur lalais Diresaun TIMOR GAP no ANPM, hodi garante efisiénsia ida ne’ebé bo’ot tebes iha setór petróleo, ne’ebé importante ba desenvolvimentu país nian;

8 – Reestrutur Polísia Sientífika Investigasaun Kriminál (PSIK) tanba falta integridade no profesionalizmu;

9 – Konsolida pás no seguransa ne’ebé nesesáriu ba desenvolvimentu nasional, hodi garante direitus, liberdades no garantias fundamentais ba sidadaun hotu;

10 – Revee lalais prosesu ilegál apozentasaun forsada ba elementu PNTL na’in sanulu resin;

11 – Lalais halo reforma no reestrutur Servisu Nasionál Intelijénsia nian, hodi garante integridade no profesionalizmu iha instituisaun ida-ne’e;

12 – Alerta ba Ajentes PNTL nian hotu, ne’ebé jura ona hodi serbí ba determindau partidu ka serbi ba partidu ruma, atu bele renunsia ba lasus juramentu nian ka, ho nune’e, sai husi PNTL;

13 – Halakon lalais aumentu impostus brutál ne’ebé aprova iha fulan-janeiru tinan 2023;

14 – Halo auditoria no revee, karik presiza, “negósius” bo’ot sira ne’ebé halo iha fin mandatu governu anteriór nian;

15 – Garante lalais disponibilidade aimoruk sira hotu ne'ebé presiza iha ospital no sentru saúde sira;

16 – Transforma merenda eskolar ba refeisaun ida ne'ebé loloos “manas” no nutritiva ba labarik sira;

17 – Hadi'a kondisaun ba assisténsia no tratamentu ba defisientes no Sentru Reabilitasaun Nasionál no, iha futuro, harii sentru análogos (hanesan) iha Munisípiu sira hotu;

18 – Halo levantamento ba nesesidade prinsipál sira ba manutensaun estradas no ba normalizasaun mota sira iha país tomak, atu hahú obra reabilitasaun urjente sira ne'e iha tinan oin.

.....

Exelénsia, Señor Prezidente Repúblika,
Distintu Konvidadus,

Atu kumpri mandatu ne'ebé Povu fó, Governu Konstitusionál IX sei iha kompromisus hanesan tuir mai ne'e ba fulan 12 governasaun dahuluk nian:

1 – Implementa reforma ba setór Justisa (liuhusi kriasaun Supremu Tribunál Justisa no formasaun, ho qualidade, ba Juíz no Prokuradó sira);

2 – Revee Planu Estratéjiku ba Dezenvolvimentu tinan 2011-2030, ne'ebé adekuaudu ba sirkunstánsia atuál sira iha país;

3 – Hahú prosesu dezenvolvimentu iha Kosta Sul;

4 – Garante gazodutu ba esplorasau “Greater Sunrise” ba Timor-Leste;

5 –Hanesan **prioridade nasional**, finaliza Fronteira Terrestre no Marítima ho Indonézia;

6 – Hahú prosesu Podér Lokál, liuhusi Desentralizasaun Governu no Asembleias Munisipais fazeadamente, hafoin kria ona ida-idak nia kodisaun infraestruturas no téknikas;

7 – Harii Komisaun koordenadora ida ba Universidade no Institutu Superiór sira hodi estuda estratéjia kolektiva ida ba definisaun assisténsia ne'ebé di'ak husi parte Estadu no implementasaun objetivu hodi hasa'e qualidade Ensinu;

8 – Revee Lei Asisténsia ba Idozus no Inválidus, atu nune'e Estadu konsidera katak "ida ne'ebé hanaran idozus" daudaun ne'e maka tenke kontinua konsidera nu'udar Erois Nasionais loloos, ne'e hanesan kategoria populasaun timoroan ne'ebé sofre funu, sofre tipu ameasa hotu no terus oin-oin tanba lakon sira-nia família, maibé la hakiduk no hasoru buat hotu hodi decide vota ba Ukun rasik-an iha fulan-agostu tinan 1999.

9 – Kria no apoia Asosiasaun Arte no Kultura Timorensé ida, hodi enkoraja joven talentozu sira, iha kampu arte no kultura oin-oin, ho objetivu atu afirma identidade timoroan no lori ba to'o iha fórum internasionál;

10 – Hasa'e número bolsu estudu ne'ebé sei atribui, tuir méritu no tuir nesesidade nasional;

11 – Konklui kontrusaun no instalasaun Kabu Fibra Ótika no garante ligasaun internet ida ho kualidade ba sidadaun sira hotu iha território nasional;

12 – Hasa'e liután número ema ho empregu;

13 – Hala'o rejistu ba sasán móvel no imóvel (uma no rai);

14 - Hahú implementa eskola CAFE ida iha Postu Administrativu hotu;

15 – Konklui programa eletrifikasaun iha país, hodi to'o ba populasaun 20% seluk ne'ebé seidak hetan asesu ba eletrisidade;

16 – Kria programa foun serbisu sazonal nian ho país amigu sira;

17 – Implementa Balkaun Úniku iha sede Munisípiu hotu-hotu, hodi permite asesu ba servisu Administrasaun Sentráal iha país tomak.

Exelénsia, Señor Prezidente Repúblika,
Distintu Konvidadus,

Governu Konstitusionál IX komprometidu atu kumpre ninia Vizaun no Misaun ba Dezenvolvimentu País nian.

Iha ninia Programa ne'ebé sei apresenta iha Parlamentu Nasionál, Governu ida-ne'e sei foka liu ba temática Infraestruturas Bázikas, hanesan iha setór Saúde no mós Edukasaun, no sei buka atu foka liu ba Ekonomia, hanesan fatór importante no vitál ba dezenvolvimentu Nasaun nian, nune'e

mós iha setór agrikultura, peska, pekuária, turizmu no inisiaun indústría kiik no média, no fazeadamente hodi hamenus sasán no produktu importaun ne'ebé bele prodús iha ita-nia rain rasik.

Bainhira konstrusaun Estadu refere ba instituisaun Estadu no administrasaun públika tomak, konstrusaun Nasaun envolve sosiedade sivil, iha ninia kapasidade téknika no intelektuál, no mós setór privadu nasional, ne'ebé sei insentiva emprededorizmu, liuliu ba feto sira.

Tanba ne'e, tinan lima ba oin merese esforsu koleтиву boot ida, no ejize ema hotu nia espíritu boot ba responsabilidade, dedikasaun, onestidade, persisténsia no korajen.

Ita sei hahú prosesu Desentralizasaun ne'ebé nesesáriu no hein kleur ona. Tanba ne'e, Governu presiza sidadaun hotu-hotu nia partisipasaun no kooperasaun iha prosesu ida-ne'e. Prosesu Desentralizasaun ida-ne'e sei ejize intelektuál no tékniku hotu husi Munisípiu ida-idak, atu participa ho ativa no konstrutivu iha diálogu ne'ebé justu no ho laran hakarak, ne'ebé sei implementa atu nune'e husi potencialidade kada Munisípiu, sei alkansa no reforsa benefísiu oin-oin hodi kontribui ba moris di'ak populasau lokál sira nian.

Tanba ne'e, há'u apela ba joven sira atubele participa. Jersaun ida-idak iha papél ida atu dezempeña iha dezafiu sira ne'ebé sei mosu iha ita-nia realidade. Joven sira iha devér atu hakoak luta foun ida-ne'e ba desenvolvimentu país nian, nune'e bele fortalese valór demokrátiku ne'ebé ita moris ka iha.

Joven sira maka futuru líder Nasaun ne'e nian, tanba sira maka sei liu husi prátika no ezemplu bele transforma ita-nia sosiedade no ita-nia ekonomia.

Governu ida-ne'e kompromete atu kria oportunidade ba joven sira hodi desenvolve sira-nia kapasidade, esperiénsia, valores, hodi nune'e bele participa tomak no ativa iha futuru Nasaun nian.

Tanba ne'e, ekonomia ka diversifikasaun ekonómika sai hanesan Pilár ida importante tebes iha mandatu tinan lima Governu Konstitusionál IX nian.

Governu kompromete atu lori gazodutu "Greater Sunrise" to'o mai Kosta Súl Timor-Leste nian. Ita sei hatudu ba mundu katak gazodutu iha Timor-Leste maka solusaun viavel ida, no ekonomikamente segura, no ita-nia orizonte iha

dezenvolvimentu indústriá petrolífera ida ne'ebé iha kapasidade atu kria rendimentu ekonómiku diretu ba ita-nia populasaun.

Dezenvolvimentu Kosta Súl, iha ámbitu dezenvolvimentu atividade setór petrolíferu no gás, sei kontinua sai hanesan prioridade ida. Estabelesimentu ba baze fornesimentu, refinaria no gazodutu ida iha rejiaun país ne'e, hanesan investimentu nesesáriu ba kriaun iha ita-nia indústriá petrolífera ne'e rasik no hodi loke empregu ba timoroan sira.

Ida-ne'e mós hanesan Prioridade Nasionál ida atu finaliza fronteiras terrestres no marítimas ho Indonézia, ne'ebé nia solusaun tenke tuir saida maka hatuur ona iha Direitu Internasionál.

Ha'u aproveita oportunidade ida-ne'e hodi deklara katak Governu IX sei tau atensaun importante ida ba Investimentu no, ho hanoin ida-ne'e, sei simu ho di'ak Empreza Estranjeira sira, ho perspectiva atu ajuda dezenvolve País no kria empregu ba timoroan sira.

Exelénsia, Señor Prezidente Repúblika,
Exelénsias,

Señoras no Señores,

Governu IX sei haree ho sériu hodi hadi'a prestasaun servisu, iha área fundamentál rua, maka hanesan saúde no edukasaun.

Iha Saúde, buat hotu-hotu sei halo hodi aumenta kapasidade téknika pesoál médiku nian, atu nune'e pesoál sira bele hahú halo tratamentu ba moras oioin ne'ebé, baibain presiza halo tratamentu iha estranjeiru.

Iha edukasaun, ami kompromete hodi haree kle'an problema asesu ba edukasaun nian, karik mosu situasaun difisil iha famílias vulneraveis. Nune'e, Governu ho hanoin atu asegura Kualidade iha nivel ensinu hotu-hotu, liuhusi kapasitasaun ba profesore sira.

Ami propoin atu kontinua dezenvolve infraestruturas ne'ebé bele asesu ho di'ak no fasil liu ba servisu sidadaun hotu-hotu no liuliu ba sira ne'ebé hela iha áreas rurais.

Bainhira ita ko'alia kona-ba sosiedade ida-ne'ebé justa liu, ita ko'alia justisa ba ita nia atus. Iha konjuntura difisil ida-ne'e, Estadu Direitu Demokrátiku, Governu IX ne'e sei fó tratamentu ida-ne'ebé presiza liu hodi hadi'a setór Justisa. Ami sei kontinua fó apoiu ne'ebé boot liu ba abilitasaun rekursus umanus timoroan ne'ebé iha, tantu iha Tribunais, iha Ministériu Públiku no iha Defensoria Públika, atu nune'e justisa bele halo ho seriedade no transparénsia, no hodi respeita supremasia lei.

Governu ne'e sei halo Auditoria ida-ne'ebé adekuada ba kazu sériu sira, ne'ebé hatudu de'it inkapasidade Autores Justisa ka sira-nia dependénsia ba intereses terseirus.

Ami kontinua hasa'e kapasidade advokasia timoroan nian, atu nune'e bele ezerse sira-nia funsaun ho absoluta, liuhusi konstituisaun formál Ordem Advogadus, ho kapasidade jestaun no formasaun iha setór Justisa importante ida-ne'e. Ami kontinua investe iha formasaun investigadores kriminais, iha especialidade nesesária sira hotu, atu garante kredibilidade boot ba prosesu sira ne'ebé lori ona ba tribunais.

Señór Prezidente,

Exselénsias,

Distintu Konvidadus,

Ita admite tiha ona hanesan Observadór iha ASEAN maibé ha'u deklara ho onestu katak ita seidauk prepara an ho suficiente, hodi sai hanesan membru tomak iha organizasaun rejionál ida-ne'e ho dalan ne'ebé konstrutiva ba país ne'e. Ba ida ne'e, Governu IX kompromete iniciativa ho Países-membrus ASEAN nian hodi hala'o estudu ida-ne'ebé klean liu kona-ba ita-nia kapasidade partisipasaun nian, liuliu iha área sira ne'ebé afeta liu inkluzau Timor-Leste iha ASEAN. Hafoin ida-ne'e maka ita bele halo selesaun ba pesoál tékniku ne'ebé iha kapasidade, iha área ida-idak, hodi representa país iha Organizasaun Rejionál ida-ne'e.

Kona-ba CPLP, ita-nia problema permanente maka domínio lingua portugeza, nune'e Governu IX kompromete, ho vizaun iha futuro, atu implementa tan

gradualmente eskola CAFE iha Postus Administrativus no kapasita profesór sira iha matéria ida-ne'e.

Kona-ba Relasoins Internasionais, enkuantu viziñus, aleinde Indonézia, ita iha Austrália. Ha'u fiar katak, ho Governu australianu atuál, ita sei hapara diverjénsia hotu-hotu iha pasadu, atu nune'e povu rua, australianu no timoroan, bele haree futuru Relasoins iha konfiansa boot no respeito mútuu ne'ebé boot liu.

Atu termina, ha'u sempre define katak ita-nia polítika esterna iha prinsípiu ida-ne'ebé konsagra sentidu independénsia no soberania: "Ba Timor-Leste, la iha aliadu ka inimigu, hotu-hotu sei hamutuk no AMIGUS de'it!". No sai hanesan ita-nia Lema, ne'ebé sei orienta ita iha Relasoins Esternas, iha Konjuntura Internasionál ida ne'ebé daudaun ne'e difisil tebes.

Ita sauda ba País Rejiaun hotu-hotu, ne'ebé fó ona apoiu internasionál mai ita no iha aspetu oioin, hodi realsa relasoins di'ak ho Austrália, Nova Zelândia, Xina, Japaun, Korea Sul, Indonézia no país ASEAN sira seluk.

Ita mós hakarak sauda ka simu ho di'ak relasaun amizade no solidariedade País sira hanesan Portugal, Brazíl, no PALOP, Kuba, Reinu Unidu, Irlanda, no EUA, nune'e mós ba Organizaun Internasionál sira, liuliu ONU no ninia Ajénsia, Banku Mundiál, Fundu Monetáriu Internasionál no Banku Aziátiku Dezenvolvimentu, no ida-ne'ebé ami hakarak reforsa lasu assisténsia téknika no profisionál, ne'ebé ami presiza hodi kumpre ami-nia misaun ba Povu Timor-Leste.

Ha'u kompromete ba ha-u-nia na rasik, iha ne'e no agora, no lori Governu Konstitusionál IX nia naran, hodi ukun ho responsabilidade, kuda antuziazmu ne'ebé boot ba membru Governu sira seluk hodi kumpre sira-nia devér, nunca atu haluha vizaun futuru nian

Ba Povu timoroan, ferik no katuas, foin-sa'e, feto no mane sira, ha'u hato'o mensajen spesiál ida: ohin, ita hasoru dezafiu boot ida atu dezenvolve nasaun ida-ne'ebé ita luta kleur maka hetan. Ho prinsípiu, valores no kompromisu ne'ebé hanesan, ita hotu-hotu lori, iha isin no klamar, durante iha luta independénsia naruk ida-ne'e, sai hanesan ita hotu-hotu nia devér atu kontinua serbisu hamutuk hodi realiza ita-nia mehi, tuir lema: "Mehi Povu nia mehi!"

Ha'u hatene katak la'ós fasil, maibé Herois Moris sira, Ferik no katuas sira, hanorin ona ita katak sira Hamutuk hasoru difikuldade ne'ebé boot liu!

To'o ona tempu atu koloka filafali Timor-Leste no Timoroan sira iha dalan dezvoltimentu.

Ha'u hateten ona.

Obrigadu ba ita boot sira-nia atensaun.

Kay Rala Xanana Gusmão